

ՕՍՄԱՆՅԱՆ ԳՐԱՔՆՆՈՒԹՅՈՒՆԸ ԵՎ ԱՐԵՎՄՏԱՀԱՅ ՄԱՄՈՒԼԸ
(1870—1890-ական թթ.)

Ա. Ա. ԽԱՌԱՏՅԱՆ

1869—1870-ական թթ. արևմտահայ հասարակական մտքի զարգացման հետևանքով մամուլն ու հրապարակախոսությունը ընդլայնեցին իրենց ազդարհիչ-հասարակական բովանդակությունը: Ազգային համախմբման գաղափարախոսությունը, որ խթանվում էր լուսավորական-դեմոկրատական շարժմամբ, գաղտնիներում հրատարակվող մամուլը կողմնորոշում էր դեպի Արևմտյան Հայաստան, որի սոցիալ-տնտեսական ու հասարակական կյանքը դառնում են մամուլի լուսարանումների հիմնական առարկան, պայմանավորում նրա հասարակական արժեքը: Ազգային-ազատագրական պայքարի գաղափարախոսությունը այս շրջանում կանգնում է հաստատուն գետնի վրա և կենսական մղումներ ստանում բռնակալության տակ հեծող ժողովրդական զանգվածների տրամադրություններից:

Արևմտահայ մամուլի զարգացումը մի հայտնի չափով համընկավ մամուլի, օսմանյան դրաքննության ձևավորման ու հասունացման ընթացքին: Այդ դրաքննությունը իրականացրել է օսմանյան բռնակալության սոցիալ-քաղաքական պատվերը, այն է՝ սրբագործել կայսրության հաստատունության գաղափարը, կասեցնել հպատակ ժողովուրդների ազատագրական պայքարի գաղափարախոսության զարգացումը, ինչպես և թուրքական լիբերալ-սահմանադրական շարժումը: Անկախ իր դրսևորումների ձևից, դրաքննությունը հանդես էր գալիս իբրև սուլթանական ռեժիմը համակողմանիորեն հիմնավորող, դրա դեմ ամեն մի օպոզիցիա կանխող ու կանխարգելող ինստիտուտ: Պրուսական դրաքննությունը, գրում էր Կ. Մարքսը, «մեղանից պահանջում է օրենքների համապատասխան վարքագիծ, պահանջում է հարգանք՝ օրենքների նկատմամբ և դրա հետ միասին մենք պարտավոր ենք հարգել այնպիսի հաստատությունները, որոնք մեղ օրենքից դուրս են դնում և կամայականությունը բարձրացնում իրավունքի աստիճանի»¹: Բռնակալության իրավունքները նույն կերպ սրբագործել է օսմանյան դրաքննությունը: Թանդիմաթի առաջին շրջանում միլիտարական օրենսդրական նորամտությունները չուրացրած թուրքական բաղադրագրերը դրաքննությանը տվեցին ձևականորեն լիբերալ բնույթ՝ ստեղծելով մամուլի ազատության երևութականություն: 1864 թ. դեկտեմբերի 31-ի «Մամուլի մասին» օրենքով նախնական դրաքննություն չէր սահմանվում, սակայն և ոչ մի բանով չէին երաշխավորվում մամուլի և լրագրողների իրավունքները²: Ոստիկանական բռնությունները սկսվում էին տալաքությունից հետո. անցանկալի ելույթները հետապնդվում էին ամենայն խրատությամբ՝ կանխելով հետագա հնարավոր հետևանքները: 1880-ական թթ. սկզբին միայն համիդյան դրաքննությունը մի կողմ նետեց ձևական ազատամտությունը և վերածվեց վարագ կանխարգելող հաճակարգի, որ ընդհանրապես անօրինակ էր դրաքննությունների պատմության մեջ:

Կայսրության մեջ մամուլի հետապնդումները առավել խիստ դարձան այսպես կոչված «Ալիի որոշումից» հետո (1867 թ. փետրվար), երբ «նոր օս-

¹ К. Маркс. Заметки о новейшей прусской цензурной инструкции.— К. Маркс, Ф. Энгельс. Соч., т. I, с. 17.

² А. Д. Желтяков. Печать в общественно-политической и культурной жизни Турции. М., 1972, с. 93.

մաններին» հրատառակությունները կառավարությանը քննադատեցին Կրետեի դեպքերի կապակցությամբ³։ Թեև որոշման մեջ նշվում էր, որ այդ «վարչական ձեռնարկն ունի բացառապես ժամանակավոր բնույթ», սակայն այն փաստորեն դործել է մինչև Աբդուլ Համիդի բռնապետության վախճանը՝ իրավական հիմք ծառայելով մամուլը օրենքից դուրս հայտարարելու համար։ Նշված որոշումից հետո գրաքննությունը սկսել է ձնշել մասնավորապես այն հայ պարբերականները, որոնք ակտիվորեն էին արձագանքում հասարակական ու ազգային իրադարձություններին, Պատժիչ միջոցառումները գործադրվեցին 1868 թ. վերջին, Ազգային ժողովի և պատրիարքի անգործունակության պայմաններում։ Անտերումը մնացած ազգային գործերին միջամտեց ժողովուրդը, որ Կ. Պոլսի Գումգափուի և Խասգյուղի եկեղեցիներում ցույցեր արեց պատրիարք Պ. Թագթագյանի դեմ⁴։ Վերջինիս և նրա կողմնակիցների բողոքների հիման վրա ձեռքարկվեցին «Մանգումեի էֆբյարի», «Փունջի» և «Ժամանակի» խմբագիրները՝ ժողովրդին հրահրելու ամբաստանությամբ⁵։ 1869 թ. հունվարին խափանվեց «Մանգումեի էֆբյարը» երկու ամիս ժամկետով։ Սալֆեթ փաշան դեմոկրատական այդ թերթին մեղադրում էր գրգռիչ հոդվածներ տպագրելու մեջ⁶։ Տպագրական տեսչության հաջորդ հարվածը հասավ «Ծիածանին»։ Թերթը 1869 թ. փետրվարին մի քանի թղթակցություն էր տպագրել արևմտահայերի հարստահարությունների մասին, ընդ որում, ազգային-կրոնական հարստահարությունները նրա էջերում դիտվում էին տնտեսական բռնությունների հետ սերտ փոխկապակցության մեջ։ «Մանգումեի էֆբյարի» և «Ծիածանի» հրապարակումներով արևմտահայ հրապարակախոսության մեջ առավել ընդլայնվում էին տնտեսական ու ազգային ձնշումներից ուժասպառ հայ գավառի դրության բացահայտման շահերը։ Տպագրական տեսչությունը իսկական խափանեց «Ծիածանը»⁷, սակայն, քանի որ խնդրին խառնվել էին Կ. Պոլսի եվրոպական հրատարակությունները (համանման նյութեր տպագրելով հայ գավառի վիճակի մասին), «Մասիսում» պաշտոնական ազդեցության գավառների կացության վերաբերյալ։ Առաջին և միակ անգամ էր, որ տպագրական տեսչությունը պարզաբանումներ էր տալիս մամուլի հրապարակումների վերաբերյալ։ Ազդում նկատելի է ընդհարումների նախաձեռնությունը հայ բնակչության վրա բարդելու կամ «վրանաբնակ քրդերին» մեղադրելու մտայնությունը, մինչդեռ, ջանախնդրաբար շրջանցվում են թուրք աղաների և շահանների բռնությունների փաստերը, որոնցով լի էին վերոհիշյալ հրապարակումները⁸։ Հետագայում, որպես կանոն, տպագրական տեսչությունը սփիւրհի բոլոր ձգներ է հերքել հայ մամուլի այս կարգի մերկացումները և դրանք համարել «խռովություն սերմանելու» փորձեր։

1870-ական թթ. սկզբից նկատվում է արևմտահայ մամուլի հասարակական տեսադաշտի զգալի ընդլայնում։ Թերթերը հաճախ դուրս էին գալիս զուտ ազգային շրջանակներից և քննադատում Թուրքիայի վարչական քայքայված վիճակը, պաշտոնեության կամայականություններն ու բռնությունները Արևմտյան Հայաստանում։ Հայ բնակչության հարստահարումների համադրմամբ այսպիսի քննադատությունը դառնում էր նպատակասլաց և ձեռք էր բերում հասարակականորեն ներգործուն ուժ։ Վարչական բարենորոգումների կապակցությամբ օսմանյան պաշտոնեությանը խիստ քննադատության ենթարկեց «Մանգումեի էֆբյարը»։ «Խնդիրք առ նորին վսեմություն մեծ վեզիրն» հոդվածում Կ. Փանոսյանը բացահայտում էր ավազակաբարո պաշտոնեության

³ G. Young. Corps de droit Ottoman. Vol. 2, Oxford, 1901, p. 321.

⁴ Ա. Երիցյան. Տաճկաստանի հայոց իրավունքները և նոցա սահմանադրությունը.— «Փորձ», 1877, № 4, էջ 289:

⁵ «Մասիս», 1 մարտի 1869:

⁶ «Մանգումեի էֆբյար», 24 մարտի 1869:

⁷ «Ծիածան», 16—18 փետրվարի 1869: «Մամուլ», 1869, № 2, էջ 14:

⁸ «Մասիս», 31 մայիսի 1869:

կողմից Սերաստիայի հայերի կրած տառապանքները, իսկ դրան հետևած մի հուլիսյան պաշտոնական վերնախավի (վուլքելաներ) բարոյական աշխատանքումն ու անբանությունը⁹։ Թերթը խափանվեց երկու ամսով՝ «ծայրահեղորեն անպատշաճ լեզու գործածելու» պատճառով։ Գրեթե միաժամանակ, տպագրական տեսչությունը մեկ ամսով դադարեցրեց «Օրագիրը»՝ կառավարության ներքին քաղաքականությունը քննադատելու համար¹⁰։ Խափանված թերթերի հանարձակ պաշտպանությամբ հանդես եկավ «Մամուլը», որը «Տպագրական աղատություն» հոդվածում դատապարտեց վարչական բռնացումները մամուլի վրա։ Կացությունից դուրս գալու ելքը «Մամուլը» տեսնում էր միայն կայուն և կիրառող օրենքների մեջ, որին կարելի էր հասնել սահմանադրական ձևի կառավարմամբ։ Լիբերալիզմի դեմ մարտնչող Բ. դուռը երեք ամսով պատժեց «Մամուլի» աղատամտությունը¹¹։

Հարկ է նշել, որ արևմտահայ հրապարակախոսները Թուրքիայում սահմանադրության հաստատման հարցը արժարժեք են կրեմտյան Հայաստանի մարչական ու տնտեսական բարենորոգումների տեսանկյունից։ Օսմանյան կառավարման համակարգի լիբերալացման ձգտումը այս իմաստով չէր առնչվում ոչ «նոր օսմանների» և ոչ էլ Կ. Պոլսի եվրոպական հրատարակությունների հակացության հետ, այլ իր հիմքում ուներ ազգային, տնտեսական ու հասարակական վիճակի բարվոքման գաղափարը։ Գրաքննությունը ըմբռնել է արևմտահայ մամուլի այս միտումները և դրանց դեմ հալածանք սկսել այն ժամանակ, երբ Կ. Պոլսի թուրքական ու եվրոպական հրատարակություններին թույլ էր տալիս քննարկել երկրում սահմանադրություն կիրառելու խնդիրը։ «Մասիս» այս առթիվ նկատում էր, թե «նույնիսկ Կ. Պոլսի այն բանը, որ տեղի ունի եվրոպական լրագիրք կգրեն ու կհրատարակեն, փորձով կտեսնենք, որ լինի լրագրաց ներքին չէ...»¹²։

Արևմտահայ գաղափարի հարստահարությունների թեման մամուլում ավելի հստակ դրսևորվեց 1872 թ. ապրիլից, երբ պատրիարք Մ. Խրիմյանը Բ. դուռ էր ներկայացրել հարստահարությունների վերաբերյալ տեղեկագիրը։ Մամուլը սատարում էր պատրիարքի բռնած դիրքը և իր հրապարակումների համաստիությունն ընդգծելու նպատակով գրեթե միշտ վկայակոչում էր պատրիարքական ընթացիկ թագրիները։ Օրինական տեսակետից գրաքննությունը մամուլին չէր կարող մեղադրել մտացածին լուրեր հաղորդելու մեջ, ուստի այս պայմաններում տպագրական տեսչությանը ոչինչ չէր մնում անելու, քան վարչական սանձարձակության դիմելը։ 1872 թ. նոյեմբերին «Մանգումեի էֆքյարում» տպագրվեցին Բաբերգի հայ բնակչության նկատմամբ գայմազամի գործադրած բռնությունների փաստերը¹³։ Թերթը խափանվեց մեկ ամսով։ Դրան հետևեց «Օրագրի» եռամսյա դադարը՝ իշխանություններին քննադատելու պատճառով¹⁴։ Տպագրական տեսչության նոր տնօրեն Մաճիտ Բեյը մամուլի սանձը ձգելու համոզված կողմնակից էր և լիբերալ թողտվությունների հակառակորդ։ Մեկ ամսում՝ 1872 թ. նոյեմբեր-դեկտեմբերին Կ. Պոլսում խափանվեց հինգ թերթ։ Միջատին փոխարինած մեծ վեդիր Մեհմետ Ռյուշտյու փաշան շտապում էր իստությունների ալիքով մոռացնել տալ իր նախորդի ներողամիտ վերաբերմունքը մամուլի հանդեպ։ Բողոքելով դրա դեմ, Կ. Պոլսի եվրոպական թերթերը գրում էին, թե մամուլի դեմ ուղղված հալածանքը գրգռում է հասարակության հետաքրքրությունը, որի պատճառով սլատոված թերթերը դառնում են հանրահայտ։ Մինչդեռ, եվրակացնում էին նրանք, ուղադրություն չդարձնելու դեպքում դատապարտելի նյութը չէր նկատվի։ Գիտողությունը նոր չէր։ Հե-

9 «Մանգումեի էֆքյար», 15—16 մարտի 1872։

10 «Մասիս», 23 մարտի 1872։

11 «Մամուլ», 25 մարտի 1872։

12 «Մասիս», 23 մարտի 1872։

13 Նույն տեղում, 11 նոյեմբերի։

14 Նույն տեղում, 28 նոյեմբերի, 1872։

գելը իր ժամանակին նկատում էր, թե «Ֆրանսիայում խոսքի ազատությունը միշտ էլ պակաս վտանգավոր է եղել, քան լուծությունը»¹⁵։

Օսմանյան գրաքննությունը գերազասում էր բռնի ուժը։ 1870-ական թթ. առաջին կեսին և գրանից հետո էլ տպագրական տեսչությունը անընդհատ խափանումներով ձգտում էր սառեցնել հայ մամուլի հասարակական ակտիվությունը։ Երկարաժամկետ դադարներով պատժվում էին շնչին մեղանշումները։ 1873 թ. հունվարին երկու ամսով խափանվեց «Մամուլը», շորս ամսով «Հայրենիքը»՝ Բերայի հայկական գերեզմանատունը կառավարության կողմից սեփականելու առթիվ քննադատական դիտողությունների համար։ Որպես կանոն, խափանման վճիռ ընդունելիս տպագրական տեսչությունը գործի ոչ մի քննության չէր դիմում և հիմք էր ընդունում միայն ամբաստանությունը։ Հ. Պարոնյանը «Մեղվի» 1873 թ. N 120-ում տպագրեց մի ծաղրանկար, որով խարաժանվում էին պատրիարք Խրիմյանի հակառակորդների մեքենայությունները։ Տպագրական տեսչությունը, սակայն, ծաղրանկարը մեկնաբանեց հակառակ իմաստով, աշխնքն՝ «Մեղուն», իբր, ծաղրել է պատրիարքին և մեղանշել բարոյականության դեմ։ Պարբերականը խափանվեց վարչական կարգով, երկու ամիս ժամկետով։ «Հանուն արդարության և ճշմարտության», գրում էր Հ. Պարոնյանը, — այս անիրավության դեմ բողոքելե զատ ուրիշ բան չենք կրնար ընել, որովհետև մեր դատավորը մարտ 12-ն է (նկատի ունի 1867 թ. մարտի «Ժամանակավոր որոշումը» — Ա. Խ.), որ առանց մտիկ ընելու կհրամայե՛ր¹⁶։

1878 թ. սկզբից սկսած հայ մամուլի նկատմամբ օսմանյան գրաքննության ցուցաբերած վերաբերմունքի մեջ նկատվում է նոր գիծ՝ անհանդուրժողություն հատկապես հայ համայնքին վերաբերող լուսաբանումների հանդեպ, որ ուղեկցվում էր ամբողջ երկրում մամուլի դեմ ուղղված հարձակումներով։ Զախչախվեցին «Նոր օսմանները» հրատարակությունները, խափանվեցին «Հաղթանակ» և «Դիյոթենը», մարտի վերջին ձերբակալվեցին և աքսորվեցին օսմանյան լիբերալ լրագրողները՝ Նամըք Քեմալը, Մուհիբ Բեյը, Ահմեդ Միդհատը և ուրիշներ¹⁷։ Ընկճելով մամուլի ակտիվությունը, կառավարությունը ծրագրում էր ստեղծել մամուլի նոր օրենք, որը մի կողմից պետք է քողարկեր վարչական կամայականությունները և մյուս կողմից՝ օրինական տեսք տար մամուլի խիստ վերահսկողությանը։ 1873 թ. ստեղծվեց մամուլի օրինագիծ կազմող հանձնաժողով՝ Արիֆի բեյի նախագահությամբ, որի անդամների մեջ էր մտնում նաև Գո. Օտյանը¹⁸։ Մամուլը հակասական լուրեր էր տպագրում օրինագծի ադատամիտ կամ անհանդուրժող բնույթի վերաբերյալ։ Համենաձն դեպս, դեկտեմբերին ավարտված օրինագիծը չհաստատվեց¹⁹։ Կառավարությունը վարչական բռնացումները գերադասել էր իրավական որևէ կարգավորումից։ Մամուլի օրենքի փոխարեն իմբագիր-հրատարակիչներին կառավարությունը հրամայեց դրոշմի տուրք՝ երկու փարա (տարեկան 50—60 լիրա) յուրաքանչյուր պարբերականի համար։ Տուրքը ղգալի նյութական ծանրություն էր, որ խորին դժգոհություն առաջացրեց լրագրողների մեջ։ Կ. Պոլսի եվրոպական հրատարակությունների խնդրանքով արված դեսպանների միջամտությունը կարողացավ միայն հետաձգել դրա գործադրումը։ Տուրքը սկսել է գանձվել 1875 թ. մարտից²⁰։ Խմբագիրների նյութական դժվարությունները չթեթևացան թերթերի գների մեջ արված փոփոխություններից։ Պարբերական-

¹⁵ Гегель. Философия права. М.—Л., 1934, т. VII, с. 338.

¹⁶ «Մեղուն», 1872, № 121-ի հավելվածը։

¹⁷ M. Serif. The genesis of Young Ottoman thought. Princeton, 1962, p. 23, 65; R. H. Davison. Reform in the Ottoman Empire 1856—1876. Princeton-New Jersey 1963, p. 297, 299.

¹⁸ «Մասիս», 3 փետրվարի 1873։

¹⁹ Նույն տեղում, 15 դեկտեմբերի 1873։

²⁰ Նույն տեղում, 13 մարտի, 25 ապրիլի 1875.

ների մի զգալի մասը ստիպված էր դադարեցնել հրատարակությունը: 1875—1878 թթ.²¹ երեք տարվա ընթացքում դադարել են երկու տասնյակի չափ հայերեն և հայատառ թուրքերեն պարբերականներ: Արևմտահայ մամուլի պատմության այս աննախընթաց երևույթի մեջ իր ավերիչ հետևանքն է թողել նաև դրոշմի տուրքը: Դարավերջին և 1900-ական թթ. սկզբներին Թուրքիայում դրոշմի տուրք էին վճարում միայն հայ պարբերականները, իսկ մյուս լեզուներով հրատարակվող թերթերն ու հանդեսները ազատվել էին դրանից²²: Աբդուլ Համիդը արևմտահայերի հանդեպ վարած իր ջարդարարական քաղաքականությունը տարածում էր նաև նրանց մամուլի վրա:

1870-ական թթ. զրաքննական կորագծի բարձրացումը կամ իջեցումը անգրագարձնում էր Թուրքիայի քաղաքական կյանքում կատարվող տեղաշարժերը: 1875—1876 թթ. լայն ծավալ ստացավ բալկանյան ժողովուրդների ազատագրական պայքարը սուլթանական բռնապետության դեմ: Ազատագրական պայքարի վերելք էին ապրում նաև կայսրության մյուս հպատակ ժողովուրդները, այդ թվում և արևմտահայերը: Քաղաքական ու տնտեսական կրախ ապրող կալույթության դրույթյան քննությունը համառորեն ներթափանցում էր հայ հասարակական հոսանքների գաղափարաբանության մեջ, մամուլի էջերը: Հայ մամուլը համակրական նյութեր է տպագրել Հերցեգովինայի և Բոսնիայի մարտերի ու պատմամեթոդների մասին, հաճախ դուգահեռներ անցկացրել հարստահարվող սլավոնների և արևմտահայերի միջև: Բուլղարիայից ստացված թղթ-խաղցրությունները, այս առթիվ նկատում էր «Մասիսը», «Հայաստանի գավառներին» և կաժ նամակներուն գրեթե ընդօրինակությունն են հարստահարությանը մատին»²³:

Տպագրական տեսչությունը այս շրջանում փորձում էր փակել Բալկաններից եկող անցանկալի տեղեկատվության հոսքը: 1875 թ. աշնանը հրապարակվեցին ծանուցումներ, որոնցով արգելվում էին ռադիկալ իրադարձությունների մասին ոչ պաշտոնական հաղորդումները²⁴: Հրապարակվեց մամուլի օրենքի լրացուցիչ հավելված՝ նույն բովանդակությամբ²⁵: Հերցեգովինայի և Զեմլոգորիայի ղեկավարի մասին լուրեր տպագրած «Օրագիրը» և «Լրագիրը» խափանվեցին: «Անպատեհ» և «անբարոյական» լուրեր տարածելու մեղադրանքով, իսկ իրականում թուրքական իշխանությունների քննադատության համար դադարեցվեցին «Միմոս» և «Մամուլ» երգիծաթերթերը²⁶: 1875 թ. նոյեմբերին մեկ ամսով խափանվեց Հ. Պարոնյանի «Թատրոնը»՝ Մուշի հարստահարությունների առթիվ կառավարությանը կտրուկ քննադատելու պատճառով: Գրաքննության ղալույթին առանձնապես բորբոքել էր նամակը սև եզրադժերի մեջ հրատարակելը, որով խորհրդանշվում էր ժողովրդի աղետալի վիճակը՝ ի հակադրություն նրա ապահովության վերաբերյալ պաշտոնական հավաստիացումներին²⁷:

Լույթյան դատապարտելով կայսրության թունավոր պալարները բացահայտող հրատարակությունները, գրաքննությունը 1875 թ. վերջին և 1876 թ. սկզբին մեղմացրեց մամուլի դեմ իր աղմկալի հալածանքները: Աբդուլ Ազիզը հրապարակել էր ֆիրման և իրադե, որով կրկնվում էին հպատակների իրավահավասարության ու ապահովության, ինչպես և բարենորոգումների մասին նախորդ հալածանքների հավաստիացումները: Դրա նպատակն էր մի կողմից հանդարտեցնել ապստամբության հարաճուն թափը Բալկաններում և մյուս կողմից՝ հակադրել տերությունների քաղաքական միջամտությանը կայսրության ներքին զործերին: Համենայն դեպս, վարչական բարենորոգումների խոս-

21 «Նոր կյանք», 1900, № 20, էջ 311—312:

22 «Մասիս», 5 նոյեմբերի 1875:

23 Նույն տեղում, 4 սեպտեմբերի, 15 նոյեմբերի 1875:

24 S. R. İskit. Matbuat rejimleri. Ankara, 1938, s. 697.

25 «Մասիս», 1, 4 հունվարի 1876:

26 Գ. Խ. Ստեփանյան. Հակոբ Պարոնյան. Երևան, 1964, էջ 86:

տուր խթանեց մամուլում գաղափարական կյանքի մասին հրապարակումների հոսքը: Այսուհանդերձ, գրաքննության պատժիչ մեքենան գործում էր. 1876 թ. փետրվարին խափանվեցին Ա. Ճեվահիրձյանի «Լուսինը» և Ն. Թյուլպենտճյանի «Լրագիրը»²⁷: Այս ժամանակահատվածում գրաքննությունը արևմտահայ մամուլը հսկողության է ենթարկել կղերական մարմինների միջոցով, որ որոշ չափով թուլացրել էր գաղափարական հրապարակումների հետապնդումները: Դա բացատրվում էր օսմանյան Թուրքիայի ներքին ու արտաքին քաղաքական իրավիճակով: Դանուբյան վիլայեթներում տերությունների առաջարկած ինքնավարության ծրագրին Բ. դուռը շարունակում էր հակադրել ընդհանուր բարենորոգումների անիրական, բայց և սուլթանական ռեժիմի համար խիստ շահավետ գաղափարը: Արևմտյան Հայաստանի վարչական ու տնտեսական քաղաքական վիճակի ցուցադրումները, այս մտայնության համաձայն, պետք է ծառայեին Բ. դուռն այն դիրքորոշմանը, ըստ որի՝ բարենորոգման կարիք են զգում ոչ միայն Դանուբյան վիլայեթները, այլև կայսրության բոլոր տիրույթները: Դրանով էլ պետք է ապացուցվեր ոչ թե մասնակի, այլ ընդհանուր բարենորոգումների անհրաժեշտությունը:

1876 թ. գարնանը տպագրական տեսչությունը «կրոնական ազատության արդար օրենքի» վկայակոչումով մամուլին արգելեց հակակրոնական բնույթի նյութեր տպագրել: Կ. Պոլսի կրոնական ժողովը չհապաղեց օգտվելու իրեն ընձեռած այդ հնարավորությունից: Ն. Նար-Պեյի, Ա. Գալֆայանի և այլոց ջանքերով երեք ամսով խափանվեց «Թատրոնը» և վեց ամսով՝ «Արևելյան մամուլը» (խափանված է մնացել երեք ամիս)²⁸:

Իրաքննական խստությունները վերսկսվեցին այն ժամանակ, երբ Մահմուդ Նեդիմ փաշան Թուրքիայի բարդացող քաղաքական իրադրության պայմաններում (ապրիլյան ապստամբությունը Բուլղարիայում, Սերբիայի մոտալուտ պատերազմի մեջ մտնելը, մահմեդական մոլեռանդության պոռթկումը Սալոնիկում, երբ ամբոխը սպանեց ֆրանսիական ու դերմանական հյուպատոսներին) սկսեց խիստ միջոցներ գործադրել պաշտոնական ուղեգծից շեղվող հրատարակությունների դեմ: Մամուլին խստիվ արգելվեց մեկնաբանություններ տպագրել «ներկա պարագաներուն և Բ. դուռն քաղաքականության վրա»²⁹: Մայիսի 11-ին մեծ վեզիրը մտցրեց ժամանակավոր նախնական գրաքննություն³⁰: Այն, սակայն, չհասցրեց գործողության մեջ մտնել: Դրան հետևած սոֆիստների (մեդրեսեների ուսանողներ) ցույցը սուլթանին հարկադրեց պաշտոնական անել մեծ վեզիրին և շեյխ-ուլ իսլամին³¹: Նոր մեծ վեզիրը վերացրեց նախնական գրաքննությունը: Մայիսի 15-ին կամովին դադարած թերթերը սկսեցին վերահրատարակվել: Քաղաքական կյանքի մակերես ելան «նոր օսմանները», որոնց անվճռական գործողությունները թուրքական պահպանողականությունից հեռացրին իրավական դրույթն ուրիշ բարելավմանը: Օտարերկրյա քաղաքական ապառնալիքին թուրքական լիբերալ քաղաքագետները հակադրեցին «միասնական հայրենիքի» շովինիստական դոկտրինան: Այս իրավիճակում Բ. դուռն և ազգային հետադիմության թելադրանքով պատրիարքը հրապարակեց իր հայտնի շրջաբերականը, որտեղ անտեսում էր հայ գաղափար օրհասական դրույթները և բարեհայտական զեղումներ ուղղում պետությանը³²: Շրջաբերականը վճռական քննադատության արժանացավ «Թատրոնում», որի պատճառով այն խափանվեց մեկ ամսով³³:

²⁷ «Լուսինը» խափանվել է ընդմիջում՝ ըստ երևույթին սկզբից իսկ անբարեհույս լինելով գրաքննության աչքում («Մասիս», 10 փետրվարի 1876):

²⁸ «Թատրոն», 9 մայիսի 1876: «Արևելյան մամուլ», 1876, № 3, էջ 199:

²⁹ «Մասիս», 9 մայիսի 1876:

³⁰ S. R. Iskit. Matbuat rejimleri, s. 618.

³¹ Midhat Ali Haidar. The life of Midhat pasha. London, 1903, p. 81.

³² «Մշակ», 2 սեպտեմբերի 1876:

³³ Դ. Խ. Ստեփանյան. Հակոբ Պարոնյան, էջ 90—91:

Օսմանյան պաշտպանողականությունը շարունակում էր մամուլը ճնշելու իր ուղեգիրը Արդուլ Աղիզին գահընկեց անելուց հետո ևս: Հետադիմականները հետաձգեցին սահմանադրության նախագծի քննարկումը³⁴, ապա մամուլին պարտադրեցին չքննարկել սահմանադրության և բարենորոգումների հարցերը՝ առանց տպագրական տեսչության թույլտվության³⁵: Օգոստոսին կառավարությունը դադարեցրեց պարբերականների հրատարակության թույլտվությունը՝ վկայակոչելով երկրի խառնակ իրավիճակը³⁶: Դրան հետևեց թերթերի խափանումների նոր ալիքը: «Անորոշ ժամանակով» խափանվեց «Նորագիրը»՝ իր խմբագիր Օ. Խոճասարյանի խմբագրական պոռթկուն խառնվածքի պատճառով, ինչպես և մի քանի հունական և թուրքական թերթեր: Գրաքննական խստությունները առանձնապես սուր դարձան այն բանից հետո, երբ «Նոր օսմանները» անգլիական դեսպանի «ղգույշ խրախուսանքով» Մուրադին հեռացրին գահից և նրան փոխարինեցին Արդուլ Համիդով³⁷: Անհավասարակշիռ Մուրադի փոխարեն լիբերալները ստացան արտաքուստ բարեմիտ, բայց գիշատի կրքերը խնամքով թաքցրած մի տիրակալ, որի բռնակալական հակումների առաջին դրժերից մեկը պետք է դառնար մամուլը: 1876 թ. օգոստոսի 30-ին «Մասիս» հավելված «Օրաթերթը» տպագրեց «Անատոլի հայերի վիճակը» հոդվածը, որտեղ մերկացվում էին թուրքական ռեզիմի և տեղական իշխանությունների սանձարձակ բռնությունները Յողդատի հայ բնակչության հանդեպ³⁸: Երկու շաբաթ անց օրաթերթը խափանվեց «օսմանյան աղատամիտ և հայրական վարչության» դեմ զրպարտություններ հրատարակելու, ինչպես և հայերին ժանարդար և բռնավոր կառավարության մը լուծին ներքև ճնշալ ներկայացնելու մեղադրանքով³⁹: Եթե մինչ այդ հայ մամուլի մեղանշումները ձևակերպվում էին իբրև «ծայրահեղություններ», հասարակական կարծիքը զրգուղ նյութեր և այլն, ապա օրաթերթի դատավճիռը ցույց էր տալիս, որ նոր սուլթանի օրով դրանք դիտվում են իբրև քաղաքական հանցանք: Դա նշանակում էր շրջադարձային կետ՝ հայ մամուլի հանդեպ գրաքննության քաղաքականության մեջ, կառավարության քննադատությունը արգելելու բացահայտ նշան: «Օրաթերթի» պաշտպանության և նրա հրապարակման ճշմարտության հաստատումով հանդես եկած «Մանդումեի էֆբյարին» փրկեց պատրիարքը, որը իր հրապարակային ելույթով հայ թերթերին պաշտպանեց թուրքական մամուլի պրպարտչական հարձակումներից⁴⁰: Սուլթանը հետաձգեց իր վրեժխնդրությունը, բայց և պարզորոշ հասկացնել տվեց, որ պատրիարքարանի դիվանատունը չի ճանաչում իբրև հայ մամուլի պաշտոնական աղբյուր: Օ. Խոճասարյանի «Նորագիրը», որ ակնարկ էր տպագրել երեսփոխանական ժողովի նիստերի մասին, անսպասելիորեն խափանվեց⁴¹: Գրաքննությունը ցույց տվեց, որ հայ մամուլի նյութերի հավաստիության հարցում այլևս չի ճանաչելու պատրիարքարանի միջնորդությունը:

Ի պատասխան այդ օրերին հայ գավառի հարստահարություններով զբաղվող երեսփոխանական ժողովի նիստերի, թուրքական մամուլը ավելի թունոտ դարձրեց իր հարձակումները արևմտահայերի վրա: Հայկական թերթերին ներքան մեղադրում էին ապստամբություն բորբոքելու մեջ, իսկ «Բասիրեթը»՝ ժամանակի ամենամասսայական թերթերից մեկը, ուղղակի գրում էր, որ պատրիարքը և աղգային ժողովը օտար քաղաքականության հլու գործիք են և դավ են նյութում պետության դեմ: 1876 թ. սեպտեմբերին, Արդուլ Համիդի գահ-

³⁴ Ю. А. Петросян. Младотурецкое движение. М., 1971, с. 80.

³⁵ «Մասիս», 17 հունիսի 1876.

³⁶ Նույն տեղում, 12 օգոստոսի 1876:

³⁷ M. S. Anderson. The Eastern question. London, 1966, p. 185.

³⁸ «Շահիվադի», 1876, № 35, էջ 273—274:

³⁹ «Մասիս», 16 սեպտեմբերի 1876:

⁴⁰ Նույն տեղում:

⁴¹ «Մշակ», 21 հոկտեմբերի 1876:

Հակալուծությունից քիչ անց, ուրվագծվեց թուրքական մամուլի բնորոշ ուղեգիծը՝ արևմտահայության դեմ ստահող զրպարտությունների ու ահաբեկման այն արշավը, որի նպատակն էր ամբողջ ժողովրդին ներկայացնել իբրև քաղաքականապես վտանգավոր և օսմանյան պետությունը թշնամի տարր։ Իր հետագա զարգացման մեջ այդ պրոպագանդը նախորդեց արևմտահայերի 1890-ական թվականների ջարդերին՝ մտքերը նախապատրաստելով դրանց գործնական կիրառման համար։ Յոգղատի հարստահարությունները կոծկելու նրպատակով Բ. դուռը հանձնաժողով կազմեց, սակայն այն ցրվեց նույնափքմահանորեն, ինչպես կազմվել էր։ Անգլիացի մի հեղինակ նշում էր, որ Բ. դուռը բանտարկել էր տվել դեպքերի հանցավորներին, բայց և միանգամայն հիմնավոր կասկած էր հայտնում նրանց պատժելու վերաբերյալ⁴²։ Որպես կանոն, բանտարկվում էին ոչ թե հարստահարողները, այլ նրանց դեմ բողոքած զոհերը։

«Օրաթերթի» պատիժը, սակայն, չկասեցրեց թուրքական իշխանությունների հարստահարության թեման մամուլում։ Ահաբեկման ու ոստիկանական հալածանքների մի ամբողջ արշավ սանձազերծվեց հայ մամուլի դեմ՝ այսպես կոչված «Շանայի (Տրապիզոն) հարստահարությունների» առթիվ։ Հարվածի տակ ընկան «Հայրենիք», «Արարատ» և «Մեծմուսլա հավատիս» թերթերը, ուրոնր նյութեր էին տպագրել հայ բնակչությանը կեղեքելու և իշխանությունների շարագործությունների մասին։ Երեք թերթերն էլ բացահայտել էին թուրքական պատիժի ջոկատների դաժանությունները այն հայ գյուղացիների նրկատմամբ, որոնք ի վիճակի չէին եղել վճարելու հարկի մնացորդները։

Տպագրական տեսչությունը անմիջապես խափանեց թերթերը և նրանց մեղադրեց շարամիտ զրպարտության մեջ։ Նրանց խմբագիրները՝ Մ. Ալվատյանը («Արարատ»), Հ. Մարգարյանը («Մեծմուսլա հավատիս») և Մ. Մելիքյանը («Հայրենիք») նախ կանչվեցին տպագրական տեսչության տնօրեն Բլաքբեյի մոտ, որից հետո գործին միջամտեց մեծ վեզիր Ռյուշտյու փաշան։ Ընդունարանում մեծ վեզիրը խմբագիրներին դիմավորեց կոպիտ կշտամբանքներով ու անողորմ ծեծի ենթարկել տվեց նրանց⁴³։ Մահացու գանակոծումից հետո Մ. Ալվատյանը այդպես էլ չապաքինվեց և վախճանվեց դեկտեմբերի 15-ին⁴⁴։ Մինչ այդ, Շանայի դեպքերի մասին թղթակցությունները հայ մամուլից արտատպել էին Կ. Պոլսի եվրոպական հրատարակությունները և միջադեպը սպառնում էր անախորժ պատմության վերածվելու Բ. դուռն դիվանագիտական շփումների համար։ Եվ Բ. դուռը կրկին մտավ «անաչառ հետաքննողի» դերի մեջ։ Կազմվեց հանձնաժողով, որի հետ միասին նոյեմբերի 9-ին Հ. Մարգարյանը և Մ. Մելիքյանը մեկնեցին Տրապիզոն՝ իրադարձությունը տեղում քննելու համար։ Ի վերջո, հաստատվեց դեպքերի ոչ միայն ճիշտ լինելը, այլև բացահայտվեցին էլ ավելի սաստիկ բռնությունների փաստերը։ Կառավարությունը ստիպված էր ազատ թողնել խմբագիրներին⁴⁵։

1877—1878 թթ. ռուս-թուրքական պատերազմը, այնուհետև Հայկական հարցի հրապարակ գալը սուլթանին հարկադրեցին ժամանակավորապես հետաձգել հայ մամուլը վերջնականապես ընկճելու մտադրությունը։ Տպագրական տեսչությունը այս տարիներին ձգտում էր ահաբեկել առանձնապես ակտիվ և հեղինակավոր հայ պարբերականները։ 1877 թ. հունիսին Կ. Փանոսյանը Սերվիլենի օգնությամբ հաղիվ փրկվեց ծանր հատուցումից՝ Բալադետից վանքաշված թուրքական զորքերի վայրագությունները հայ գավառում բացահայտելու պատճառով⁴⁶։ Կ. Փանոսյանը ձերբակալվեց և կանգնեց ռազմական մի-

⁴² W. M. Ramsay. Impressions of Turkey. New York, 1897, p. 206.

⁴³ A. Gallenga. Two years of the Eastern Question. London, 1877, p. 340—341.

⁴⁴ Ա. Ալվատյան. Պատմություն հայ կեսարիո. Կահիրե, 1937, էջ 2039:

⁴⁵ «Մշակ», 23 դեկտեմբերի 1876:

⁴⁶ «Մասիս», 18 հուլիսի 1877: «Շիրակ», 1905, № 5, էջ 358:

նիստությունից ատյանի ատյան, իսկ «Մանգումենի էֆենդի» խափանվեց երկու ամսով:

Իր դաշակալության առաջին իսկ ամիսներին սուլթանի առաջին գործերից մեկը ևղավ Լերսիփոխանական ժողովում հաստատել տալ խիստ հետադիմական տպագրական օրինագիծ, որով, ի դեպ, արգելվում էր երգիծական թերթերի հրատարակությունը: Օրինագծի քառասուն հոդվածից քսանը պարունակում էին պատիժներ, իսկ մնացած կեսը ավելի էր սահմանափակում մամուլի ինքնուրույնությունը⁴⁷: Խորհրդարանը օրինագծում մտցրեց մամուլի վիճակը թեթևացնող ուղղումներ, բայց սուլթանը իր հերթին մերժեց դրանք: 1878 թ. փետրվարին մամուլի օրինագիծը, ի թիվս այլ օրինագծերի, մնաց օսմանյան վաղածին խորհրդարանի փլատակների տակ: Մամուլն ընկավ սուլթանի անսահմանափակ իշխանության ներքո: Մինչ այդ, 1878—1879 թթ. Աբդուլ Համիդը զբաղված էր Արևմտյան Հայաստանի բարենորոգումների հարցում տեղությունների հետ քաղաքագիտական խաբեություններով, ուստի և հայ մամուլին ղեկնա թույլ էր տրվում անդրադառնալ գավառի կացությանը: Պատրիարքի և ազգային վարչության հանդեպ որդեգրած արտաքուստ զուսպ ընթացքին Բ. զուր Վերջ տվեց 1879 թ. մայիսից: «Հայաստան» բառը փոխարինվեց «Քրդաստանով», մեծ վեճից հայերին մեղադրեց «հավատարմության ուղուց շեղվելու» մեջ: Մշակվեց մամուլը սանձահարելու նոր ուղեգիծ: 1879 թ. սկզբին խափանվեց «Լրագիրը»՝ Կարինի և Ալաշկերտի հայ բնակչության Ռուսաստան գաղթելու պատրաստության մասին գրելու պատճառով⁴⁸: Սակայն դրանից հետո թերթերը ղեկնա շարունակում էին գավառական թեմաներով հրապարակումները: Դրանց վերջ տալու համար օգտագործվեց հայատառ թուրքերեն «Թերեմանը էֆենդի» և թուրքական «Վաքըթի» դատը: Դատարանում «Վաքըթի» փաստաբանը «Թերեմանը էֆենդի» խմբագիր Տ. Ծիվելիյանին և արտոնատեր Ա. Սազալանին զրպարտեց իբրև ապստամբական կալվածակերպության հետ կապ ունեցողների: Հենց դատարանում նրանք երկուսն էլ ձերբակալվեցին՝ դատավորի համար բավական էր եղել ոչ թե մեղադրանքի հիմնավորվածությունը, այլ բուն իսկ մեղադրանքը: Բանտարկվածներն ազատ արձակվեցին միայն պատրիարքի ևռանգուն միջամտությունից հետո⁴⁹:

«Թերեմանը էֆենդի» դատավարությունը գրաքննությունը հայ մամուլին կտրականապես արգելեց շոշափել բարենորոգումների հարցը կամ քննադատել իշխանություններին: Սուլթանը սկսեց իր համատարած հարձակումը արևմտահայերի ազգային մարմինների, գրականության ու մշակույթի, բարեգործական-կրթական ընկերությունների դեմ՝ ընդսմին հրեշավոր ծայրահեղության հասցնելով գրաքննության հսկողությունը⁵⁰: Արգելվեցին հայերեն ատենախոսությունները, հատուկ ուշադրություն դարձվեց Հայաստանի պատմական անցյալը մոռացնել տալուն: Թուրքական «Օսմանլը» և «Հազըզաթ» թերթերը անարգում էին արևմտահայերի ազգային արժանապատվությունը, զրպարտություններ և ստեր տեղում նրանց դավաճանության մասին: «Օսմանլըն» պահանջում էր ոչ թուրքական մամուլի խմբագիրներին արտոնել Թուրքիայից: «Հազըզաթը» մշակեց լրագրական բարբերին մինչ այդ անծանոթ, նողկալի մի գործելակերպ. թերթն իր խմբագրությունում թխում էր իբր հայերի կողմից ուղարկված՝ թուրքերի և քրդերի դեմ թշնամանքով լեցուն հոդվածներ, ապա տևական բանավեճ մղում դրանց դեմ՝ ճգնելով թշնամանք հրահրել այդ ժողովուրդների միջև⁵¹: Կեղծիքը խրախուսող տպագրական տեսչությունը հայ

⁴⁷ R. Devereux. The first Ottoman Constitutional period. Baltimore, 1963. p. 199—200.

⁴⁸ «Լրագիր», 12 հունվարի 1879:

⁴⁹ Նույն տեղում, 10, 15 հունվարի:

⁵⁰ Մ. Գ. Ներսիսյան. Հայ ժողովրդի պատմության էջերից. Երևան, 1982, էջ 187:

⁵¹ «Մշակ», 20 սեպտեմբերի 1880:

մամուլին արգելել էր մերկացնել իր ստվերի հետ կոխվ տվող գրապարտիչ թերթին:

«Թերճեմանը էֆքյարի» գատավարությունից հետո պարբերականները զրվեցին կամ իսպառ դադարելու կամ պաշտոնական ուղեգծին լրիվ հնազանդվելու երկրնտրանքի առջև: Ընդմիջտ խափանվեց Բ. դռան տնտեսական քաղաքականությունը դատապարտած «Լրագիրը»⁵²: 1880 թ. սկզբից սուլթանը աստիճանաբար մտցրել է նախնական գրաքննություն, սակայն մինչև 1883 թ. նախնական գրաքննությունը դեռևս համակարգի չէր վերածվել և հայ մամուլը համարձակվում էր «անթույլատրելի» նյութեր տպագրել: Իսկ այն ժամանակ, երբ բացահայտվեց Կարինի «Պաշտպան հայրենյացի» գործունեությունը, գրաքննությունը դարձավ ծայր աստիճան կասկածամիտ ու հիվանդագին: 1882 թ. վերջին բոլորովին խափանվեց «Մամուլը», որը տպագրել էր մի հայրենասիրական բանաստեղծություն: Դա գնահատվեց ոչ ավել, ոչ պակաս, քան «ազգային հեղափոխության մարշ»⁵³: Խմբագիրը մեղադրվեց «Պաշտպան հայրենյացի» հետ կապեր ունենալու մեջ և դատապարտվեց ցմա՜ս աքսորի⁵⁴: Գ. Ալվազյանը ներման արժանացավ 1886 թ.: Ակններևաբար «Պաշտպան հայրենյացի» դատավարությունից հետո ևս սուլթանը քաղաքական նկատառումներով ձգտել է աննշմար դարձնել այդ կազմակերպության նշանակությունը՝ շարունակելով դատավարությունից առաջ բռնած իր գիծը⁵⁵: Պատժից չկարողացավ խուսափել նաև «Մասիսը». չօգնեց Կ. Ություճյանի հանրահայտ զգուշությունը: Թերթը խափանվեց երկու անգամ, երկուական ամսով՝ 1883 թ. մայիս-հուլիսին և հոկտեմբեր-դեկտեմբերին: Արդու շամիրը ձեռնարկեց մի շարք ահաբեկիչ միջոցառումներ հայ մամուլի դեմ: 1883 թ. օգոստոսին խափանվեց «Մանգունի էֆքյարը»՝ գավառական «վնասակար հրատարակությունների» պատճառով: Նույն ամսին ձերբակալվեց և բանտ նետվեց «Մեճմուսյը հավատի» խմբագիր Հ. Թուլայանը: Արևմտահայերի դեմ սուլթանի հալածական քաղաքականությունն ընդդիմանալով՝ այս հրատարակախոսը գրել էր. «Եթե քուլերան աստո՞ր բարկության արդյունքն է, պետք է սպասել, որ Թուրքիո մեջ ևս ծագի, ուր բռնակալությունն ի լրումն հասած է»⁵⁶:

Հետևանքի պայմաններ ստեղծվեցին երգիծական մամուլի համար: 1883 թվականի հուլիսին Հ. Պարոնյանը պատրաստվում էր դադարեցնել «Միծաղի» հրատարակությունը՝ խստություններն ուժեղանալու պատճառով⁵⁷: Սուլթանի հրամանով բոլոր տպարանատերերը և խմբագիրները պարտավոր էին գրաքննական մարմիններին ներկայացնել երաշխավորողների, որոնք պատասխանատու պետք է լինեին կատարվելիք հնարավոր հանցանքների համար: «Ամենուն աչքը վախցած է,— գրում էր «Արձագանքի» թղթակիցը,— և ոչ ոք հանձն կառնու երաշխավոր լինել ամեն մի երևակայական հանցանքի համար, զոր կառավարություն կրնա վերագրել մանավանդ հայ լրագրապետին և տրպարանապետին, որք ժամանակե մի վեր մասնավոր հոգածության կենդիլին կառավարության կողմն»⁵⁸: Մամուլը լրտեսելը դարձավ սուլթանի կարևոր հոգսերից մեկը: Գաղտնի ոստիկանության մի ստվար զանգված զբաղված էր միայն օտար և տեղական թերթերում ծածկանունով կամ անստորագիր հանդես եկող հեղինակներին հայտնաբերելու հարցով: Թերթերին արգելվեց քննադատական դիտողություններ անել անկարգությունների, վարչական թերությունների մասին: Լրագրական բարքերի մեջ խոր արմատներ նետեցին կեղ-

⁵² «Լրագիր», 27 սեպտեմբերի 1880:

⁵³ «Մշակ», 3 փետրվարի 1883:

⁵⁴ «Արձագանք», 1883, № 23, էջ 332:

⁵⁵ Մ. Գ. Ներսիսյան. Հայ ժողովրդի ազատագրական պայքարը թուրքական բռնակալության դեմ. Երևան, 1955, էջ 197:

⁵⁶ «Մասիս», 20 սեպտեմբերի 1883:

⁵⁷ «Մշակ», 7 սեպտեմբերի 1883:

⁵⁸ «Արձագանք», 1883, № 39, էջ 551:

ծիբը, հերյուրանքը և պրովոկացիան: Հիվանդագին կասկածամտության և մատնությունների մթնոլորտում իր 44-ամյա ուղին ավարտեց արևմտահայ առաջին ազգային պարբերականը՝ «Արշալույս արարատյանը»⁵⁹:

1880-ական թթ. երկրորդ կեսին հայ մամուլը արդեն ենթարկվում էր նախնական ամենախիստ գրաքննության: Ոստիկանությունն ու գրաքննիչները նույնիսկ պատմական դեպքերի ու անձանց հիշատակության մեջ որոնում էին խոսվածության ու ապստամբության ականարկներ և հայ մամուլից ձգտում էին արսատախիլ անել Հայաստանի պատմական անցյալը հիշեցնող ամեն մի հրապարակում: 1888 թ. գործնական կիրառում էր գտել գրաքննական շհրապարակված մի կանոնադրություն, որ մի որոշ շափով պատկերացում է տալիս համիդյան հրաշավոր գրաքննության մասին: Մի քանի կետերից կազմված այդ հրահանգներում ցանկալի էին համարվում մամուլի այն նյութերը, որոնք վերաբերում էին «սուլթանի թանկագին կյանքին» և երկրի տնտեսական զարգացմանը. արգելվում էին շարունակելի հողվածները, բազմակետերը, խընդրադրերը, թագակիր անձանց դեմ արված մահափորձերի, ցույցերի և գործադուլների մասին նյութերը և այլն⁶⁰: Ֆրանսիացի հեղինակ Պ. Ֆեշը նշում է ևս երկու արգելք՝ «Հայաստան» անվան հիշատակումը և բուն իսկ այս կանոնադրության հրապարակումը⁶¹: Ի դեպ, հենց «Հայաստանի» գործածության պատճառով 1889 թ. խափանվեցին ֆրանսերեն «Ստամբուլ» և հունական «Նեոլոգոս» թերթերը, որոնք գրել էին, թե «երկու բարձրաստիճան պաշտոնատար Հայաստան մեկնեցան՝ քննություններ կատարելու և բարեկարգություններ ներմուծելու հրամանով»⁶²: Դրան հետևեց «Արևելքի» խափանումը, որն այդ լուրն արտատպելիս թեև «Հայաստանը» փոխարինել էր «Անատոլիումով», բայց չէր կարողացել խուսափել պատժից: Թերթերի դադարի հրամանի համար բավական էր ամենաշնչին պատճառով իսկ հարուցված բողոքը. այս կերպ 1880—1890-ական թթ. բազմիցս խափանվել են «Մասիսը» և «Հայրենիքը»: Միայն 1891—1892 թթ. «Հայրենիքը» խափանվել է չորս անգամ՝ վեց ամիս ընդհանուր տնտղություն, որից հետո, մինչև 1896 թ. հուլիս ամիսը՝ ևս երեք անգամ⁶³:

Ռուսական գրաքննությունը 1890-ական թթ. արդեն դարձել էր բազմաշերտ ու նյութալիորված մի համակարգ, որը փաստորեն բռնակալության անվտանգությունն ապահովող ոստիկանական ուժնաքանակ մի հաստատություն էր: Բաժանելով ամբողջ երկրի մամուլի դառն ճակատագիրը, հայ մամուլը ենթարկվում էր նաև առանձնահատուկ հսկողության, քանի որ նյութի թուրք գրաքննիչներից առաջ նախ «սանբում» էին հայ պաշտոնյաները. ներքին գործերի մինիստրությունում գործում էր տպագրական տեսչության ենթաբաժին՝ երեք հայ գրաքննիչներով: Սրանցից մեկն ըստ իր քմահաճույքի վերաձևում էր փորձանմուշները, իսկ մյուս երկուսը թերթի տպագրվելուց հետո իրականացնում էին ետտպագրական ստուգումը և թուրքերեն համառոտում հողվածները: Դրանից հետո գործի էին անցնում թուրք գրաքննիչները: Տեքստը նախ կարդում էր տպագրական տեսչի օգնականը, ապա տեսուչը, սա նյութը հանձնում էր ներքին գործերի խորհրդականին, վերջինս՝ ներքին գործերի մինիստրին: Երեկոյան թերթը հայտնվում էր «սադրազամի շանթալի» մեջ: Իր հերթին, թերթը ստուգում էր հանրային կրթության պաշտոնատան գրաքննիչը, որը ներքին գործերի մինիստրություն էր հայտնում իր գիտողությունները: Գրաքննական հաջորդ աստիճանին կանգնած էին երկու զուգահեռ վերահսկող օղակներ՝ Յլգրդի գրաքննությունը և ոստիկանությունը: «Արդ,— եզրափակում է Ա. Արփիարյանը,— Դուռը, հանրային կրթության պաշտոնատունը, Յլտըզը, ոստիկանատունը իրարմե բոլորովին տեսակետներով կգիտեն ունե հողված կամ լուր:

⁵⁹ «Մշակ», 26 նոյեմբերի 1888:

⁶⁰ «Արևելյան մամուլ», 1909, № 30, էջ 716:

⁶¹ «Նոր կյանք», 1900, № 15, էջ 236:

⁶² Նույն տեղում, № 16, էջ 255:

ինչ որ մեկուն անվնաս կթվի, մյուսին վտանգավոր է»⁶⁴։ Առավել կաշուն ու մանրախնդիրը ոստիկանական գրաքննությունն էր, որը կապեր էր հաստատել հետադիմական ու ապագայնացած թափթփուկների հետ։ 1898 թ. Տ. Ճիվելեկյանը դժվարությամբ ազատվեց ոստիկանական հետապնդումներից, երբ դիմել էր «Սուրհանդակ» անվամբ թերթ հրատարակելու խնդրանքով։ Ոստիկանության առջև «Սուրհանդակը» ստուգաբանել էին «սուր հանդակ»՝ «սուրը հանել, թաքմիշ ըրե» (թաքմիշ՝ խրել) իմաստով⁶⁵։ Մեկ տարի անց միայն հաջողվեց ստանալ թերթի հրատարակության արտոնագիրը։ Գրաքննությունը ստեղծել էր ոչ միայն օտար և տեղական գործիչների, մտավորականների արգելած անունների ցուցակներ, այլև տաբու դարձվածների և բառերի անվերջանալի ու շարունակ ուճացող շարքեր։ Դեռևս 1883 թ. «Մանգումեի էֆքյարը» խափանվել էր «սաղթ իրատե» (կեղծ հրամանագիր) դարձվածի համար, քանի որ «իրատե» նվիրական բառ էր և անթույլատրելի էր դրան «սաղթ» (կեղծ) որակում տալը⁶⁶։ Արգելված էին «հիմար», «հիմարանոց» (հիշեցնում էին Մուրադ V-ի հիվանդությունը), «աստղ», «աստղաբաշխություն» (Համիդի պալատը կոչվում էր Յիզըդ՝ աստղ) և այլ բառեր։ Նույն «Մանգումեի էֆքյարը» 1892 թ. «Լեվընդ հերալդից» անգգուշորեն թարգմանել էր «աստղերը վայր կրկնեն երկնքից» (յիզըղար դոքյուլեջեքլերի) դարձվածքը, որն առաջացրեց գրաքննական հիդրայի խոռվքը. թերթը անհապաղ խափանվեց⁶⁷։ Կտրականապես արգելվում էին արտատպությունները Թուրքիայի սահմաններից դուրս հրատարակվող մամուլից։ Արտասահմանի մամուլը ենթարկվում էր երկշերտ գրաքննության՝ Բ. դուան և պալատի գրաքննիչների կողմից⁶⁸։

Հայ մամուլի գրաքննական ավերածությունները և հալածանքը իրենց գաղափարակետին հասան 1894—1896 թթ.՝ արևմտահայության ջարդերի ու կոտորածների ժամանակաշրջանում։ Ահաբեկման ու սպառնալիքների գործադրմամբ հայ մամուլին արգելվեց գրել 1894 թ. Կարինում, Մուշում, Վանում, Զմշկածագում և այլուր տարածված սովի մասին։ Գավառի այդ աղետալի վիճակի վերաբերյալ կցկտուր լուրեր տպագրած «Ավետաբերը» խափանվեց⁶⁹։ Նույն թվականի հոկտեմբերին դադարեցվեց «Ծաղիկի» հրատարակությունը. շաբաթաթերթի ամբողջ մեղքն այն էր, որ ընթերցողին տեղեկացրել էր Վիեննայի Մխիթարյանների կողմից հայ մամուլի 100-ամյակի առթիվ խմբագրներին ու թերթերին մանրակար պատկերի տպագրության մասին⁷⁰։

1895 թ. աշնանը Կ. Պոլսում և գավառներում սուլթանի կազմակերպած հայերի կոտորածներից հետո թուրքական իշխանությունները մտադրվեցին հայ մամուլը ծառայեցնել իրենց ստահող պրոպագանդին։ Ներքին գործերի մինիստր Նազըմը հայ պարբերականներին պատվիրեց հոգվածներ տպագրել բարենորոգումների մասին և մյուս կողմից՝ կոտորածների ամբողջ մեղքը բարդել իրենց իսկ՝ հայերի վրա։ Խմբագիրները հրաժարվեցին ջարդարարների գործիքը դառնալուց. «Արևելքը», «Հայրենիքը» և «Ճերիտեի շարգիյեն» խուսափողական որոշ նյութեր տպագրեցին, որ առաջացրեց ոստիկանության զայրույթը։ Վերջինս ինքը կապմեց ժողովրդի «ապստամբությունը» վկայող հրապարակումներ և տպագրական տեսչության միջոցով ուղարկեց վերահիշյալ թերթերին⁷¹։ Խմբագիրները դիմացան ճնշմանը. պարտադրվող հոգվածը չտպագրելու նպատակով «Հայրենիքի» խմբագիր Հ. Շահնաղարը ինքնակամ դադարեցրեց «Հայրենիքի» հրատարակությունը։ Ոստիկանությունը ստիպված

64 Նույն տեղում, № 21, էջ 326։

65 «Մշակ», 27 հոկտեմբերի 1898։

66 «Նոր կյանք», 1901, № 4, էջ 44։

67 «Շիրակ», 1905, էջ 357։

68 E. Pears. Forty years in Constantinople. New York, 1916, p. 116.

69 «Մշակ», 11 հունիսի 1894։

70 Նույն տեղում, 22 հոկտեմբերի 1894։

71 Նույն տեղում, 18, 25 նոյեմբերի 1895։

էր հրաժարվել իր պրովոկացիոն ծրագրից: Կարճ ժամանակ անց գրաքննությունը վրեժ լուծեց «Հայրենիքից»: Թերթը խափանվեց 1895 թ. վերջին՝ 11. Արփիարյանի վրա մահափորձ կատարելու մասին լուր տպագրելու պատճառով, իսկ 1896 թ. հուլիսի կեսին պարբերականը փակվեց: Հ. Շահնազարը բանտ նետվեց «խոտովություններ հրահրելու» միօրինակ մեղադրանքով⁷²: Նույն թվականի հոկտեմբերին իսպառ խափանվեց նաև «Արևելքը», որն ընդդիմացել էր հայ ազգաբնակչությանը հնազանդության հրավիրող հողվածներ տպագրելուն⁷³: Թուրքական թերթերը, մինչդեռ, արևմտահայության կոտորածների փաստերը ծածկում էին «գոհացուցիչ վիճակի», «կատարյալ անդորրության և ապահովության» հավաստիացումներով: Որոշ դեպքերում գավառների «անդորրությունը» նշվում էր իրեն արդյունք այն բանի, որ զորքը ցրել է հայտնված աղաղակախմբերին: Այս առթիվ է. Պիրսը նկատում է, որ միայն այն փաստից, որ տեղական թերթերը ավաղակներին ավելի շատ են հիշում, քան սովորաբար, կարելի էր ենթադրել, որ արտակարգ բան է կատարվել⁷⁴: Երբեմն կոտորածների մասին կարելի էր կռահել այն հրապարակումներից, որոնց մեջ հայտնվում էր, թե համաճարակները կամ երկրաշարժերը գավառներում վերացվել են «սուլթանի անսահման իմաստության շնորհիվ»⁷⁵:

1890-ական թթ. սկսած սուլթանը կաշառել էր ամբողջ թուրքական մամուլը իր առատ և կանոնավոր նպաստներով: Այսպես, 1891 թ. «Թերթյումանը հաղորդաթի», «Սաբահը» և «Իկդամը» Բ. դոնից ստանում էին ամսական 400 դուլարի շափով նպաստ⁷⁶: Նպաստները զնալով դարձան սուլթանի և թուրք մամուլի դադափարական միասնության միակ հիմքը. «Համանոս-ուլ ումեմը» ստանում էր 240 000, «Սաադեթը»՝ 36 000, «Իսթանբուլը»՝ 24 000 դուլար⁷⁷ և այլն: Կաշառք էր տրվում նաև Կ. Պոլսի և արտասահմանի օտարալեզու պարբերականներին⁷⁸: Թուրք թերթերի պարտականությունն էր սուլթանի ծննդյան և դահակալության տարեդարձերին ստրկամիտ խմբագրականներ ձեռնել նրա իմաստությանը: Գրաքննիչներն ամենայն մանրախնդրությամբ ստուգում էին բոլոր թերթերի վարքագիծն այդ օրերին: 1899 թ. սուլթանի քարտուղար Սյուրույա փաշան նշում էր. «Մոնիթոր օրինեթալ» թերթից բացի, մյուս բոլոր թերթերը ծննդյան օրը շնորհավորելու պարտականությունը կատարել են հավատարմորեն և հնազանդությամբ»⁷⁹:

1880-ական թթ. մինչև Արդուլ Համիդի տապալումը թուրքական գրաքննությունը ծանր հարված հասցրեց արևմտահայ հրապարակախոսության զարգացմանը: Այսուհանդերձ, հրապարակախոսության ֆունկցիան արևմտահայ մամուլում մասամբ անցավ այլ ժանրերի նյութերին՝ դիմանկարային ակնարկին, դրախոսականներին, գեղարվեստական դրականությանը, իրողություն, որ նկատելի է ամբողջ երկրում հրատարակվող մամուլի համար⁸⁰: Ազգային և քաղաքացիական գիտակցության բարձրացման գործում լուրջ նշանակություն ունեցավ, մանավանդ, ռևոլյուստական գրականության զարգացումը, որի գեղարվեստական վերապատկերման հիմնական օբյեկտը դարձան Արևմտյան Հայաստանը և բոնություններով լեցուն նրա սոցիալ-տնտեսական իրականությունը:

⁷² Նույն տեղում, 6, 10 օգոստոսի 1896:

⁷³ Նույն տեղում, 24 հոկտեմբերի 1896:

⁷⁴ E. Pears. Life of Abdul Hamid. New York, 1973, p. 138.

⁷⁵ Sadik Shahid bey. Islam, Turkey and Armenia and how they happened. St. Louis, 1898, p. 143.

⁷⁶ Ahmed Emin. The development of Modern Turkey as measured by its press. New York, 1914, p. 78.

⁷⁷ N. Bangolu. Basın tarihimizin kara ve ak günleri. Istanbul, 1960, s. 7—8.

⁷⁸ Նույն տեղում, էջ 44:

⁷⁹ Ю. А. Петросян. Турецкая публицистика эпохи реформ в Османской империи (конец XVIII—начало XX вв.). М., 1985, с. 114.

ОСМАНСКАЯ ЦЕНЗУРА И ЗАПАДНОАРМЯНСКАЯ ПЕЧАТЬ (1870—1890-е гг.)

А. А. ХАРАТЯН

Резюме

В основе отношения османской цензуры к печати лежала политика безопасности султанского режима, а также подавления идеологии освободительной борьбы угнетенных народов империи. Цензура применяла полицейские меры по отношению к армянским периодическим изданиям, вскрывавшим национальное и социально-экономическое угнетение Западной Армении и критиковавшим разложившийся султанский режим. Произвол цензуры достиг беспрецедентных масштабов в 80—90-е годы XIX в., когда по отношению к армянской печати стала применяться та же погромная политика, которая применялась по отношению к самому западноармянскому народу. Была создана многоуровневая предварительная цензура, которую осуществляли Порты, полиция, министерство внутренних дел и другие органы. Преследования, аресты и высылка армянских редакторов-издателей стали обычным образом действий для цензуры. Цензура эпохи «эзюма» нанесла тяжелый удар по западноармянской публицистике, однако оказалась не в состоянии полностью нейтрализовать общественное воздействие периодической печати.